

# STRATEGIJA RAZVOJA SPORTA OPĆINE STARI GRAD SARAJEVO

## UVOD

Sportsko Sarajevo je u svojoj historiji zabilježilo niz vrhunskih sportskih rezultata, organiziralo značajne svjetske i evropske sportske događaje, doživjevši potpunu afirmaciju organizacijom **XIV ZIMSKIH OLIMPIJSKIH IGARA 1984.** godine. Mnogobrojni su pojedinci i klubovi, sportaši i entuzijasti koji su takvim dostignućima gradili Sarajevo afirmišući sve njegove civilizacijske vrijednosti.

Međutim, pitanje je da li se grad odužio svojim građanima za sve ono što su oni u sportskom životu učinili za svoje Sarajevo? Ili, da li o Sarajevu možemo govoriti kao o sportskoj metropoli?

Siromaštvo sportskih objekta, i po broju i po strukturi, pokazuje da Sarajevo ne ispunjava osnovne evropske standarde, tako da je logičan zaključak da se grad maćehinski odnosio prema svojoj omladini, svom stanovništvu, prema svojim sportašima.

Posljedice su katastrofalne, jer uz grad stasaju generacije sarajlija, koje ne znaju pravilno hodati i trčati, koje upće ne znaju plivati. Nije teško uočiti ostale psihološke, socijološke, ekonomske i druge negativne efekte, koji generiraju destabiliziranje društva, i sada i u buduću. Ako je to tako, a jeste, ako grad ne uvažava elementarne civilizacijske zahtjeve, onda je polemično da li je Sarajevo urbana sredina, da li je uistinu univerzitetski centar, da li uopće može pretendirati ka kulturnoj, ekonomskoj i političkoj metropoli.

Ovakvo stanje najdrastičnije se odražava na najstarije dijelove grada, na mahale Starog Grada. Na ovom području ne postoji niti jedan adekvatan sportski objekat, čime je građanima ove općine limitirana mogućnost bavljenja sportom. Stari Grad jeste specifične konfiguracije i prenapučen stambenim i drugim objektima, ali uzroci su isključivo subjektivne naravi, jer je ovo gradsko područje izostavljeno iz svih planskih dokumenata, što bi njegovim građanima otvorilo perspektive bavljenja sportom u najširem smislu rječi.

Nepovoljno stanje sporta u Sarajevu dodatno je usložio rat, odnosno agresija na Republiku Bosnu i Hercegovinu. Ostale su ruševine i stanje nakon dugogodišnjeg granatiranja opkoljenog grada. Ali, to, samo po sebi, predstavlja vanrednu priliku i mogućnost da u miru, u godinama obnove i razvoja, nadoknadimo sve propušteno.

Sarajevo jeste kulturna, ekonomska i politička prijestolnica ovog dijela Evrope, što sve nas obavezuje da njegovom stanovništvu osiguramo elementarne standarde življenja, što je podrazumjevajuće za svaku urbanu sredinu. Jedan od najvažnijih segmenata takvih neophodnosti jeste sport u svim njegovim aspektima i dimenzijama.

Općina Stari Grad ovim programom razvoja sporta konkretno doprinosi ukupnom razvoju sporta u Sarajevu, u čijoj projekciji i realizaciji je neophodno okupiti sve relevantne pojedince, organizacije i institucije Kantona Sarajevo, Federacije BiH i Bosne i Hercegovine.

## **STANJE SPORTA U OPĆINI STARI GRAD**

### **I – OBJEKTI**

#### **Zatvoreni objekti**

1. U Starom Gradu postoji šest fiskulturnih sala pri osnovnim školama, prosječne površine oko 350 m<sup>2</sup>, prilično saniranih, ali nedovoljno opremljenih sportskim rekvizitima. Standardi su da je sala dimenzije 25 x 45 m, i da posjeduje prateće prostore. Prema tome, niti jedna od ovih sala ne ispunjava uslove za normalni trenažni proces i adekvatno provođenje nastavnog sata fizičke kulture.
2. Mini kuglana u Sportskom centru Kovači, u okviru koje su dvije, potpuno devastrane, male poluautomatske staze.
3. Fitnes klub "Bob", komercijalnog karaktera, u privatnom vlasništvu, koji je svojom namjenom, opremljenošću i stručnim djelovanjem obogatio sportsku ponudu u Starom Gradu.

#### **Otvoreni objekti**

1. Bob staza Trebević – olimpijski objekat, potpuno uništen, a vrlo je diskutabilna ekonomska opravdanost njegove rekonstrukcije.
2. Sportski centar Kovači, koji posjeduje dvije sportske plohe, od kojih je gornja namjenjena za košarku. Drugi teren, sa gledalištem, je normalnih dimenzija za „male” sportove (košarka, odbojka, rukomet itd.). Centar je prilično obnovljen, s tim da je potrebno sanirati aktivne plohe, opremiti ga rekvizitima, te urediti stazu za bočanje. Nepovoljni klimatski uslovi u Sarajevu limitiraju puno korištenje ovog sportskog kompleksa, što je osnovni razloga da objekat ne koristi niti jedna sportska ekipa.
3. Bazeni Bentbaša – sportsko-rekreacioni kompleks, koji je prilično obnovljen. Mali je broj dana u godini kada se bazeni mogu koristiti za kupanje, tako da Sarajevo nema niti jedno kupalište koje bi bilo u funkciji tokom cijele godine.
4. Pri osnovnim školama postoji šest dvorišta, prosječne površine oko 650 m<sup>2</sup>, koja su ustvari asfaltirane površine koje služe za igru. Igrališta uz škole "Hamdija Kreševljaković" i "Edhem Mulabdić" (odjeljenje u ulici Bistrik) prilično su prostrana i daju mogućnosti izgradnje sportskih objekata u normalnim dimenzijama.

### **II - ORGANIZIRANO SPORTSKO DJELOVANJE**

Na području Starog Grada djeluju slijedeći sportski kolektivi:

Aero klub,  
Fudbalski klub "Hrid"  
Fudbalski klub "Iskra",  
Streljačko društvo "Mustafa Dovađžija",  
Fudbalski klub "Partizan",  
Karate klub "Stari Grad",  
Sportsko društvo "širokača",

Teniski klub "Tenis pro",  
Fudbalski klub "Vratnik" i  
Fudbalski klub "Vrbanjuša"

Ako znamo da je SD "Mustafa Dovadžija" organizirano pri JP "Vodovod i Kanalizacija", da je "Aero klub" u fazi obnove i imovinsko-pravnim poteškoćama, te da je u okviru SD "Širokača" jedino aktivan nogomet, jasno je da je u Starom Gradu dominantno prisutan nogomet, dok drugih popularnih sportova uopće nema. Te činjenice provociraju nekoliko pitanja:

- da li određeni sportovi, kao npr. košarka, nisu za djecu Starog Grada, ili ekskluzivitet bavljenja tim sportom imaju neka druga djeca?
- šta je sa našom ženskom djecom i omladinom?

Ne postoje pouzdani podaci o tome koliko se djece i omladine organizirano bavi sportom kroz navedene kolektive. Nezvanično je da se u ovim sredinama okuplja oko 300 sportaša, što je u odnosu na demografsku strukturu jako malo. To je svega oko 2,2 % ukupne populacije, čija struktura je slijedeća:

broj stanovnika -----oko 43.000.  
djeca od 1 do 7 godina -----oko 2.500.  
djeca od 7 do 14 godina -----oko 3.500.  
omladina od 14 do 18 godina - oko 2.500.  
omladina preko 18 godina -----oko 5.000.

Slijedeće pitanje je, kakav vaspitni i stručni tretman imamo u sportskim kolektivima, gdje se okupljaju navedene grupacije mladih?

Istina je, da se ne primjenjuju savremni tehnološki principi, i sa aspekta stručnosti trenersko kadra, i sa aspekta programski osmišljenog rada, kojim se obuhvataju djeca od najranije mladosti do pune sportske zrelosti. Od ovakvih ocjena izuzima se Karate klub "Stari Grad", koji okuplja preko 150 djece (svih dobnih i polnih struktura) sa kojima, na najbolji mogući način, rade veoma stručan tim trenera, pedagoga, liječnika i psihologa. Određeni nivo dostigli su FK "Vrbanjuša", koji je limitiran nedostatkom terena i materijalnim poteškoćama, kao i TK "Tenis pro", čija komercijalna osnova ograničava masovniji teniski angažman.

Kad uzmemo u obzir sve navedeno, i kada sagledamo stanje sportske infrastrukture u Starom Gradu, onda dolazimo do poražavajućih istina, od čega podvlačimo podatak, da se u Općini Stari Grad svega 200 do 250 djece i omladine, ili maksimalno 2,5%, bavi sportom u pravom smislu te riječi.

### **III – NASTAVNI PREDMET FIZIČKE KULTURE**

Ovim obaveznim nastavnim programom je obuhvaćeno oko 3500 djece, sa kojima rade šest nastavnika fizičke kulture, od kojih su dva završila fakultet za fizičku kulturu. Taj podatak, uz neadekvatne sale, slabu opremljenost rekvizitima, mali broj sat sedmično, naslijeđeni neravnopravni odnos prema ovom nastavnom predmetu, su dovoljna argumentacija za konstataciju da se sistematično ugrožava mogućnost podizanja psiho-fizičkih sposobnosti naše djece.

Neprihvatljivo je da se ovaj nastavni predmet tretira kao mogućnost za igru i relaksaciju. Zato je potrebno posebno naglasiti da kontinuirana i stručno osmišljena tjelesna aktivnost, ne doprinosi samo zdravlju djeteta, već, prije svega, podiže natjecateljski duh, gradi ljubav prema prirodi, te nadgrađuje psihološku, socijološku, kulturološku i svaku drugu konstituciju mlade ličnosti.

## **RAZVOJ SPORTA NA PODRUČJU OPĆINE STARI GRAD SARAJEVO**

Prethodna analiza određuje da razvoj sporta na području Općine Stari Grad prioritarno treba sagledavati u kontekstu identifikacije potreba za sportsko-rekreacionim kompleksima i objektima, kojima bi se u potpunosti udovoljilo potrebama Općine i Sarajeva za organiziranim i masovnim bavljenjem sportom i rekreacijom. Način i dinamika realizacije planiranog pretpostavlja sveobuhvatnu akciju, kojom će se projektovano odgovoriti na najširu društveno-političku, kulturnu i ekonomsko-privrednu opravdanost ostvarivanja ovakvih ciljeva.

Vrijeme obnove i razvoja, politički usaglašeni imperativi ulaska u evropske integracione procese, čine ovaj spisak neophodnih potreba jednako prevashodnim, i jednako pravičnim, kao i sve ostale političke, ustavno-pravne i ekonomsko-privredne tranzicije bosanskohercegovačkog društva.

Poštujući takve principe i opredjeljenja, u daljem tekstu su naznačeni samo lokaliteti sa načelnim prijedlogom sadržaja. Logično je, da će ostale odgovore dati posebni podprogrami i konkretni projekti, oko kojih će se okupiti kompetentne organizacije i institucije.

### **I – SPORTSKO - REKREACIONA ZONA STARI GRAD**

Konstitucija ovakvih ciljeva predstavlja projektovanje i izgradnju sportsko-rekreacione transverzale, koja, čineći jedinstvenu sportsko-rekreacionu zonu, zaokružuje lokalitete Starog Grada povezane slijedećom linijom:

**Barice – Pašino Brdo – Zmajevac – Faletići – Dolina Mošćanice – Dolina Miljacke –  
Hrid – širokača**

#### **Izletište Barice**

Bujna vegetacija crnogorične šume sa velikom koncentracijom ozona, blaga konfiguracija tla na nadmorskoj visini 1000 do 1300 m, potpuno autentičan ambijent u neposrednoj blizini grada, predstavlja svojevrsan prirodni fenomen. Lokalitet posjeduje kompletnu komunalnu infrastrukturu, a sa gradom je povezan s dvije saobraćajnice.

Područje je pogodno za izgradnju planinskih odmarališta, šetališta, trim staza, sportskih ploha, kao i skijaških i sankaskih staza.

Urbanizacijom ovakvog kompleksa, ne samo da bi se rasteretila ostala sarajevska izletišta, već bi se prostor predisponirao za razvoj sportskog turizma. Sve to provocira izgradnju adekvatnih turističko-ugostiteljskih kapaciteta, što bi, izvjesno je, imalo ekonomskog smisla.

### **Nogometni centar Pašino Brdo**

U Kantonu Sarajevo je pokrenuto projektovanje nogometnog kompleksa na Pašinom Brdu, odnosno lokalitetu Streljište. Velika popularnost nogometa, mnogobrojnost klubova i nedostatak kapaciteta su inicirali ovaj projekat kojim bi se dobili: veliki teren sa gledalištem, dva pomoćna terena, prateći objekti i sadržaji.

Ovim centrom, specijalizirane namjene, će se nogometu osigurati zaslužno mjesto, stvoriti elementarni uvjeti rada ekipama Starog Grada i Sarajeva, te imati objekat koji neće samo rasteretiti postojeće stadione u gradu, već i osigurati preduvjete za unapređenje nogometa i stvaranje vrhunskih sportskih rezultata.

Nema sumnje da će postojanje ovog sportskog kompleksa biti opravdano masovnošću i klubova i sportaša. Ekonomska opravdanost je neupitna, jer 850 m nadmorske visine, blizina Izletišta Barice, mala udaljenost od centra grada, pretpostavljena visoka tehnološka opremljenost, su reprezentativne reference, koje će privući sportske kolektive Bosne i Hercegovine i inozemstva.

### **Teniski centar Zmajevac**

Prostor Kasarne Zmajevac je smješten u borovoj šumi, a u okviru njega su uređeni poligon i ostali sadržaji, koji se mogu iskoristiti za izgradnju teniskih terena. Gradili bi se zatvoreni tereni, čime bi se, koliko-toliko, udovoljilo potrebama grada za ovom vrstom sportskih objekata. Ujedno će se otvoriti perspektiva masovnijeg bavljenja tenisom u Starom Gradu, jer je očigledna sve veća popularnost ovog sporta, kao i njegova snažna ekspanzija u Sarajevu. Obaveza je društveno-političke zajednice, ne samo da prati ove trendove, već i da uspostavlja odnose koji će sportove, kao što je tenis, činiti jeftinijim i dostupnijim svima onima koji se njime žele baviti.

### **Dječiji sportsko - rekreacioni centar Faletići**

Ovaj kompleks bi se locirao na mjestu sadašnje Kasarne Faletići. To je prostrano područje u autentičnom prirodnom ambijentu, sa nekoliko izvorišta vode. Postojeća infrastruktura i prirodni uvjeti omogućavaju instaliranje široke lepeze sportskih sadržaja smještenih u otvorene i zatvorene objekte.

Kompletan kompleks bio bi sportskog i rekreativnog karaktera, namjenjen isključivo za djecu i omladinu. Znači, da bi centar organizirano koristila naša mladost okupljena u klubovima, sportskim školama, predškolskim, školskim, visokoškolskim i drugim ustanovama.

Aktuelizirana je mogućnost definiranja ovog prostora na ovaj način, što je kandidiralo interesovanje MUP Federacije BiH. Adekvatna opremljenost za ljetne i zimske sportove može pomiriti interese i MUP-a i specijaliziranost namjene za mlade generacije, što bi, pored racionalnije investicione konstrukcije polučilo i bolju iskorištenost kapaciteta.

## **Dolina Mošćanice**

Kompletan vodotok potoka Mošćanica, od izvorišta u Gornjim Faletićima do ušća na Darivi, je tradicionalno izletišta sarajlija, posebno ljeti, kada se pretvara u masovno kupalište. Veliki broj građana na kupalištu i njegova neuređenost obavezuje Općinu i Grad da pronalazi rješenja kojim bi se uspostavilo bezbjedno korištenje ovog izletišta. Neophodno je, cijelim tokom Mošćanice urediti kupališta, osigurati čistoću vode, kao i instalirati prateće sadržaje, kao što su tuševi, toalete, i slično.

## **Dolina Miljacke**

U završnoj fazi je izrada Regulacionog plana Bentbaša, koji obuhvata tjesnac Miljacke na potezu od Kozije ćuprije do Darive. Planom se urbano definiše tradicionalno kupalište sarajlija, na način da se favorizuju rekreativni sadržaji. S obzirom da je usvajanje Plana u toku, te s obzirom na činjenicu da su Općini kandidirani idejni projekti za određene parcele, a koji predviđaju izgradnju specijaliziranih sportskih objekata, potrebno je, i ovim dokumentom, podvući potrebu za takvim terenima:

**Nogometna škola:** Na prostoru nekadašnje eksploatacije šljunka između Crvenice i Kozije ćuprije, na desnoj strani Miljacke, potrebno je izgraditi velikonogometne terene, manjih dimenzija, koji bi bili u funkciji nogometnih škola koje egzistiraju u Sarajevu, a koje su se, masovnošću i kvalitetom, potvrdile u dosadašnjem radu.

Ovaj objekat i Nogometni centar Strelishte, koji je u funkciji takmičarskog nogometa, predstavljali bi zaokružen sistem, kojim bi se u potpunosti odgovorilo problemima nogometnog sporta u Starom Gradu.

**Teniski centar Dariva:** Postojeći zahtjev i idejni projekat predviđa izgradnju dva zatvorena i dva otvorena teniska terena. Dobijanje takvog objekta u Starom Gradu je od kapitalnog značaja za razvoj teniskog sporta, o čemu se Općinsko vijeće, na neki način, već pozitivno odredilo.

## **Hrid**

Na području Hrida, preciznije na lokalitetu Popovog Gaja i njegove bliže okoline, postoje ambijentalne pogodnosti za izgradnju manjeg izletišta sa određenim rekreativnim sadržajima.

Bliža historija Sarajeva, odnosno značaj ove sredine za obranu grada, kandidira Popov Gaj za uređenje u kontekstu trajnog obilježavanja historijskih događaja, te da se u tom okviru traži mogućnost izgradnje sportskih ploha, šetališta i trim staza. Nesumljivo je da bi se taj kompleks masovno koristio radi lijepe panorame, blizine grada, kao iz razloga velikog broja lokalnog stanovništva, koje u svom okruženju nema niti jedan objekat sportskog karaktera.

## **Bob staza Trebević**

Bob staza Trebević je urbano definisan sportski sadržaj koji je u vrijeme Olimpijade opravdao svoju postojanost. Vrijeme nakon Olimpijade pokazuje da bob, skeleton i sankaski sport nisu ostvarili pretpostavljenu ekspanziju, tako da smo imali nesklad između skupoće

držanja u funkciji staze, naspram veoma malog broja klubova i sportaša – korisnika ovog kompleksa.

Rat je u potpunosti devastirao objekat, s tim da je ostala staza i mogućnost revitalizacije objekta na način koji bi uvažio ekonomski faktor i iskustva koja imamo. Prema tome, Bob stazu Trebević treba urediti kao izletišta koje bi se koristilo za rekreaciju. U tu svrhu se može koristiti staza kao sankalište, pod uslovom da je bezbjedna za rekreativce.

### **Sportsko-rekreacioni centar Širokača**

Relativno veliki broj lokalnog stanovništva, njihova ljubav prema sportu potvrđena dugogodišnjim djelovanjem Sportskog društva širokača, stradanje ovog dijela grada tokom agresije, obavezuju Općinu Stari Grad da mladosti ovog područja obezbjedi adekvatnije uslove življenja. Izgradnja sportskih objekata na ovom području je vrlo usložena nepovoljnom konfiguracijom tla i vlasničkom strukturom. Ali, bez obzira na takve okolnosti, obaveza je da se ozbiljnije investira u ovu vrstu objekata kako bi se stanovnicima Širokače i okoline omogućilo bavljenje sportom.

Ako su navedeni ciljevi prihvatljivi, onda je neophodno osigurati uslove za izgradnju manje sportske sale, barem dva otvorena trena, nekoliko dječijih igrališta, što bi, uz trim staze i šetališta, činilo jedinstven sportsko-rekreacioni kompleks.

## **II – IZGRADNJA SPORTSKIH OBJEKATA U UŽEM JEZGRU OPĆINE**

Sportsko - rekreaciona zona Stari Grad se prostire na užoj periferiji Općine, i s njome su predviđeni sportski, rekreacioni i izletnički sadržaji. Međutim, i pored brojnosti i raznovrsnosti tih kapaciteta, stanovnicima Starog Grada, još uvijek, nismo osigurali uslove za organizirano bavljenje sportom.

Krećući se tragom takvih potreba neophodno je izgraditi dodatne objekte u veoma zahtjevnom urbanom prostoru. Složenost takvih nepovoljnosti sužava prostor djelovanja, pa su rješenja koja se nude - jedino moguća, tako da je imperativ kandidovane lokalitete što hitnije staviti u funkciju ovog programa i projekata koji slijede.

### **Sportske sale**

Da bi se osnovcima osigurali normalniji uvjeti za nastavni predmet fizičke kulture, a ujedno da bi otvorili mogućnost zaživljavanja sportova, kao što su košarka, rukomet, odbojka i sl. minimum je izgradnja barem dvije sale dimenzija 45 x 25 m, bez gledališta.

Ako je navedeno prihvatljivo, onda objekte treba locirati na lijevoj i desnoj strani Miljacke, tako da su jednako dostupni svim školama i svim građanima Starog Grada. Takvi principi opredjeljuju jedino dva moguća rješenja, a to su škole koje imaju prostorne mogućnosti: Oš “Hamdija Kreševljaković” i Oš “Edhem Mulabdić” – odjeljenje u ulici Bistrik.

Također, u kontekstu osmišljavanja funkcionisanja domova kulture na mjesnim područjima Općine Stari Grad, dobro bi bilo sagledati mogućnost pretvaranja kino sala u višenamjenske prostore. Primjer je kandidatura kino-sale Doma kulture Logavina.

Postojeću dvoranu potrebno je preurediti sa ciljem stvaranja prostora koji bi koristili borilački sportovi, plesne škole, kulturno-umjetnička društva, baletne sekcije i slični. Ako se parter sale izravna i na bočne zidove postave ogledala, te obezbjedi ostala oprema, dobio bi se idealan prostor za navedene namjene, s tim, da bi se sala mogla i dalje koristiti, uz postojeću pozornicu, za priredbe, predstave, takmičenja i slične manifestacije.

### **Sportska dvorana**

Potreba izgradnje sportske dvorane, kapaciteta gledališta do 3000 sjedišta, je objektivizirana slijedećim razlozima:

- Grad Sarajevo posjeduje samo jednu dvoranu za sportske događaje koje prati manji broj gledatelja. To je Mala dvorana KSC "Skenderija", kapaciteta 800 gledatelja., koja uopće ne može odgovoriti potrebama.
- Rijetki su sportski događaji koji traže korištenje Gradske dvorane i Dvorane Zetra, tako da su ova dva kapaciteta dovoljna za organizaciju manifestacija za 8 do 10 hiljada gledatelja.
- Kapaciteti KSC "Skenderija" su jedini zatvoreni prostori u kojima se dešava glavina sportskih aktivnosti u Sarajevu. Te mogućnosti koriste klubovi, sportske škole i rekreativci, što, pored ograničenih mogućnosti, stvara nezdravu atmosferu među sportašima, klubovima, strukovnim savezima itd. itd.
- Postojanje samo jednog objekta otvara mogućnost monopolskog ponašanja, povećanja troškova i svih drugih negativnosti koje su već prisutne u sarajevskoj, sportskoj svakodnevnici.

Prema tome, nesumljivo je da bi sportska dvorana kapaciteta do 3000 gledatelja u potpunosti opravdala postojanje, i sa aspekta potreba, i sa aspekta iskorištenosti.

Kada se sve ovo ima u vidu, i kada taj problem posmatramo u kontekstu ovog programa, logično se kao rješenje nameće izgradnja dvorane na prostoru Sportskog centra Kovači. Ovaj program ne insistira na ovakvom rješenju, jer je ono opterećeno nekolicinom dilema:

- sportska dvorana bi bila smještena na prostoru postojećeg objekta, izgrađenog grubim sknavljenjem duhovnog i kulturnog naslijeđa Bošnjaka;
- blizina šehidskog mezarja Kovači polemizira opravdanost ovakvog sadržaja, što može ugroziti hitnost rješavanja problema;
- Sportski centar Kovači je jedini otvoreni stadion u Starom Gradu, tako da je upitna opravdanost njegovog ukidanja.

Svijest o postojanju argumentacije suprostavljene ovim konstatacijama trasira traženje rješenja koje neće ugrožavati ničije interese, koje neće politizirati ciljeve, i koje će, općim prihvatanjem, biti u funkciji što bržeg zaobilazjenja problema. Pošto je na području Općine Stari Grad nemoguće naći adekvatnu parcelu, cjelishodno je tražiti rješenje na području Općine Centar, na način što bi lokacija bila jednako dostupna svim građanima Sarajeva.



## **Igrališta za djecu**

Nedostatak igrališta za djecu na području Starog Grada je evidentan, tako da imamo situaciju da djeca i omladina, ovog dijela grada, svoje slobodno vrijeme provodi uglavnom na ulici. To je prisutno i u mahalama i u užem jezgru, tako da su, u uslovima saobraćajne preopterećenosti, nedostatka saobraćajne kulture i problema parkirališta, naša djeca svakodnevno izložena svim vrstama rizika koje takve okolnosti proizvode. Sve to iziskuje što hitnije djelovanje, tako da Općina mora vrlo brzo pronaći što veći broj parcela za izgradnju dječijih igrališta.

Dječija igrališta su asfaltirane površine sa, ovisno od veličine, ugrađenim koševima, golovima, mrežama i slično. Igrališta bi trebala biti ograđena u cilju zaštite osnovne namjene. Pretpostaviti je, da bi mnoga igrališta mogla služiti i kao parkirališta u noćnim satima, čime bi se pomoglo rješavanju problema saobraćaja u mirovanju, uz adekvatne ekonomske efekte, čime bi osigurali sredstva za održavnje igrališta.

Usvajajući Strategiju razvoja sporta Općina Stari Grad direktno određuje budućnost svog stanovništva, te otvara perspektive immanentne svakoj urbanoj sredini Evrope na ulasku u 21. stoljeće. Ovo je samo jedan od načina kako se građanima Starog Grada i Sarajeva stvaraju uvjeti kvalitetnijeg življenja, a de se pri tome uvažavaju tradicija i napredak, kulturno-historijsko naslijeđe i najšire društvene potrebe građanstva.

Broj i raznovrsnost sportsko-rekreacionih sadržaja otvoriće mogućnost zaživljavanja niza sportskih disciplina za koje naša djeca imaju ljubavi i talenta, a koje im nikada nisu bile dostupne. Ovaj program je problematizirao samo jedan segment sporta, ostavljajući drugim projektima da sveobuhvatnije, planski tretiraju sve ostale aspekte ove društvene zbilje. Predviđa se samo stvaranje osnovnih preduslova za nogomet, košarku, odbojku, rukomet, streljaštvo, borilačke sportove, automobilizam, određenih atletskih disciplina itd. što će, nesumljivo je, animirati veliki procenat naših djevojčica i dječaka. Ostala pitanja, koja su već prisutna i koja će se još više aktuelizirati kada dobijemo prve sportske objekte, tražiti će adekvatne odgovore za koje se Općina Stari Grad u velikoj mjeri već organizacijski pripremila.

Takođe, Strategija razvoja sporta Općine Stari Grad je samo identificirala neke od problema i naznačila osnovne ideje, koje su, na određen način, u pojedinim prijedlozima konkretizovane jasnim ciljevima. Istina je da je put od ideje do realizacije zahtjevan i složen. Na Općini je da pronađe rješenje kako da u tu svrhu angažuje sve svoje potencijale, a da time ne ugrozi ostale segmente života i rada na nivou svojih prinadležnosti. Normalno je da će se odgovori na niz konkretnih pitanja i problema tražiti kroz sveobuhvatnu društvenu akciju koja će multidisciplinarno okupiti pojedince, klubove, sportske asocijacije i državne institucije.

Da bi se došlo do toga, neophodno je uspostaviti neke preduslove za koje općina Stari Grad ima potencijala. To podrazumjeva elaboriranje Studije razvoja sporta Općine Stari Grad, izradu provedbene dokumentacije i formiranje tima stručnjaka koji će kompletnu realizaciju voditi od početka do kraja.

**PREDSJEDNIK KOMISIJE  
ZA SPORT OPĆINE STARI GRAD**  
Mensud Handžić, s.r.

Sarajevo, jula 1998. godine